

欽定剿平粵匪方略

欽定勦平粵匪方略卷十八 壬子年

九月初二日己酉徐廣縉奏言查福興帶兵勦辦

鬱林土匪業已行抵濛江經臣調回梧州卽飭

該總兵挑選兵勇共二千餘名派遊擊蘇崇阿

隨同福興統帶以資調遣福興於八月初八日

在梧州起程臣近接探報知逆匪大股仍踞郴

州總兵和春現紮營獅子嶺圍勦此起援勦之

兵已飭令取道賀縣江華由閒道馳赴大營奏
入報

徐廣縉又奏言臣勦辦艇匪節據拏獲首匪西
南長等供出前次投誠之張釗等在濠江充當
撫勇仍與艇匪勾連並有接濟火藥等事隨卽
密飭查拏現經拏獲訊據供稱伊在省城帶領

壯勇因聞大兵攻勦艇匪潛回探聽卽送火藥
一千餘斤接濟等情不諱查張釗卽大頭羊旣
經投誠膽敢勾通賊匪潛謀接濟實屬罪不容
誅當將張釗及同獲之夥匪六名一併正法並
曉諭各屬如果該匪等真知改悔予以自新儻
仍有通盜等弊則罪在不赦斷難法外施仁奏

八

上嘉之

同日

上諭內閣曰自廣西軍興以來將及兩載朕念生民塗炭穹旰焦勞無時或釋前因大學士賽尙阿人尙樸誠能任艱苦特命爲欽差大臣前往督勦又慮其秉性慈柔諄諄誥誡特賜遏必隆刀冀其隨時振厲以肅軍威上年大軍圍賊於新墟紫金山等處初猶屢

獲勝仗追賊竄踞永安葛爾一城圍攻半載有餘迄無成效轉致損將折兵任賊鴟張圍撲桂林省城旋又竄掠興安攻陷全州繼復任賊竄入楚境連陷數城現又分股圍撲長沙省城賽尙阿身爲統帥調度乖方總由號令不嚴賞罰失當以致勞師糜餉日久無功實屬辜恩大負委任著革職拏問由徐廣縉派員解交刑部治罪程喬采總制兩湖特命前往湖南

督辦防堵一年之久如果布置得宜堵禦嚴密何至任賊竄越竟由道州郴州永興一帶直撲省城該督初聞賊警遽返長沙已不免張皇失措繼復株守衡州一籌莫展前已摘去翎頂不足蔽辜著卽行革職仍留軍營辦理糧臺事務駱秉章鮑起豹均有文武地方之責不能豫爲防範咎亦難辭惟念現在長沙城內守禦正當喫緊之時著俟勦辦省城賊匪完竣

後再降諭旨前次賊竄永安朕卽察知賽尙阿攻剿不能得力特諭徐廣縉統兵前赴廣西會剿嗣因梧州艇匪業已剿除淨盡桂林賊匪竄入湖南仍命該督統兵赴楚督剿嗣據奏稱接奉諭旨當卽啟行並飭福興統帶兵勇數千名先期開道前進計此時已抵湖南軍營徐廣縉平素辦事慎密操縱合宜朕所深悉著卽授爲欽差大臣接授關防並署理湖廣總

督所有軍營及地方文武統歸節制賽尙阿所帶文武各員著徐廣縉察看酌量分別去留該大臣膺茲重任必能整飭紀律嚴明賞罰迅奏膚公以慰朕望所有廣東廣西江西湖北與湖南毗連地方均責成各該督撫提鎮等嚴密堵禦勿令竄越

初四日

辛亥

賽尙阿程喬采奏言據報賊踞省城南門外民房八月初九日瞿騰龍等帶領楚苗

各兵縋城出戰殺賊多名次日將附近賊營房
屋並賊哨棚數十間盡行燒燬十一日南河港
地方有賊船五十餘隻木簞數架在彼灣泊經
長沙府縣密派壯勇潛往焚燒賊船二十餘隻
奪獲木簞二架餘賊遁逃仍踞南門外鼇山廟
黃土嶺等處十三日鄧紹良會同王蒙琳瞿騰
龍分兵出擊槍斃賊匪百餘名生擒一名割獲

首級四顆奪獲器械多件副將朱瀚亦用礮擊
毀僞西王所踞民房並斃賊匪十餘人是日和
春抵省將兵勇分紮各門當卽進城面與在城
文武籌度據稟城內江西四川合本省官兵四
千餘名足資守禦仍於各城周歷惟南門一面
受敵城之西面本屬瀕江和春當將所帶楚黔
各兵均於東門外紮營王家琳帶兵於西門外

東西湖橋紮營開隆阿帶廣東等兵在北門外
紮營和春之營距賊巢甚近其城外餉道及往
來文報均可通行十五日分隊進攻該逆伏巢
不出十六日於蔡公墳挖築營壘賊由妙高峯
寺右突出百餘人經貴州兵勇擊退是日向榮
舟達湘潭計日可以抵省其郴州之賊併由西
路全竄十三日李瑞追及於豐樂橋頗有斬獲

次日追及於永興城外見賊紛紛渡河奔入城內據探郴州賊之大夥併歸永興並聞長沙賊被官兵擊敗有由郴州搬取大夥之信先是永興之賊分股千餘取道安仁前赴長沙常祿卽令張國樑分撥捷勇並楚兵千名往安仁大路攔剿一面設法攻城近城北面崇福菴地方有賊大營一座張國樑挑選精勇二千餘名令勇

目李連升程智泉分爲兩隊於十四日繞路潛至東北兩門外設伏參將慶福帶領楚兵川勇由西門外沈沙港一路焚燒賊營常祿親率湖北官兵由靈龕橋新路下街大路進攻賊隊千餘衝出我兵詐退俟其追至伏兵槍礮齊發賊匪多被擊斃李連升帶捷勇五百爲前隊詐爲賊兵直奔崇福菴賊營該匪正在觀望李連升

等已偏近賊營火罐噴筒齊發賊衆忙亂我兵乘勢擁入殺賊無數餘賊奔竄城中之賊欲出救應張國樑等乘勢搶入城門刀矛齊舉斃賊四五十名生擒十六名賊由東門棄城而竄東門外豫伏潮勇又槍斃數十名生擒七名餘匪望茶山拌死竄走西門外及沈沙港賊見城中火起亦棄城東奔由浮橋過河兵勇追殺擄落

淹斃者不少時已昏黑未能窮追賊俱東走安
仁將與永興賊合往長沙常祿督帶兵勇望安
仁縣進發行近安民司一帶隔河見有賊衆千
餘卽分隊前進甫抵河邊賊舉旗迎撲我軍涉
淺直衝賊陣賊不能敵紛紛亂竄兵勇乘勝追
殺數里暫於河干紮營據獲賊供稱僞太平王
洪秀泉僞東王楊秀青兩賊首已在前隊此係

中隊後隊聞中隊爲官軍擊敗想必退回等語
臣等現飭常祿等仍前追勦設法攔截並飭李
瑞等軍趕緊前追合力勦洗一面飭令和春等
慎防賊之大夥踵至並將總兵清保所帶江西
兵千名調回該省在交界處所擇要籌防以期
兼顧東越江西一路奏入

上諭內閣曰永興被賊占踞經總兵常祿等分撥兵勇

在安仁縣大路攔剿一面設法攻城乘間擁入殲獲賊匪多名立將永興收復常祿前在道州剿賊不力交部議處此次設法攻剿尙知愧奮所有前得處分著加恩開復德亮追賊出力著交部議敘張國樑奮勇殺賊疊次立功著以都司儘先升用

同日羅繞典向榮鮑起豹駱秉章奏言和春等連日督兵轟擊城外踞匪該匪堅壁不出臣向

榮與臣繞典等密商於二十日分三路進攻中路由白沙井直攻賊營左路由仰天湖進攻妙高峯之賊右路由蔡公墳沿城至南門大街進攻賊巢河北鎮王家琳督帶官兵在於西面攻擊俱於寅刻齊到賊營中路官弁兵勇撲至牆邊爭先搶上該匪於牆邊編插竹籤我軍隨進隨拔將賊營外牆拆毀數十丈一擁而入連開

槍礮斃賊多名時參將鄭魁士正欲搶上內牆
該匪於牆內連放槍礮該參將額顱突被槍傷
血流滿面猶復揮兵冒煙攻擊奈牆堅終難攻
入左路秦定三江忠源帶領兵勇出隊見妙高
峯賊巢突出賊匪五六百人卽經我軍一齊壓
下賊衆紛紛敗退右路官弁兵勇由蔡公墳直
下先拋火罐燒燬房屋並撲至牆邊將其外牆

木板拆毀乘勢拔去編地竹籤計三路攻巢斃賊四百餘人兵勇受傷一百四十餘名陣亡十三名二十二日查探郴州大股賊匪由醴陵路緣山來省臣等當派秦定三等各帶兵勇迎頭攻剿逆匪三四千人分撲貴州湖南兵營盤並分千餘人由東路欲包我軍之後經兵勇奮力迎擊槍礮齊施繼以刀矛賊始敗退入巢官兵

亦卽撤隊計斃賊一百餘名貴州朗洞營參將
任大貫頭被礮傷登時陣亡副將德安骹受石
傷知府江忠源被賊矛傷右骹落馬經楚勇救
護得生並立時將此賊砍斃此外兵勇亦有傷
亡現在飛飭帶兵員弁迅速趨程前進另籌防
剿並疊咨湖北江西各省嚴密堵截以免竄逃
奏入

上諭內閣曰八月二十等日官兵分三路進攻白沙井
妙高峯等處賊巢賊勢屢經挫折著各路帶兵大員
迅速圍剿毋任竄逸陣亡之貴州朗洞營參將任大
貴著交部從優議卹傷亡弁兵查明照例請卹

初七日

甲寅

上諭內閣曰駱秉章著暫留湖南辦理長沙防剿事宜
事竣再行奏明請旨

聞

初八日乙卯署山西巡撫郭夢齡奏言前准戶部

咨指撥山西續收捐輸銀三十萬兩口外清查
案內完解銀二萬六千兩速卽委員解赴湖南
以供支用等因遵卽委員解交奏入報

初十日丁巳賽尙阿程喬采奏言據報李瑞等於

十七八等日追賊至安仁之白泥塘馬龍亦帶

川兵趕到賊聞大隊踵至直竄茶陵二十一日
我軍追至茶陵州城賊已於夜閒分竄攸縣醴
陵李瑞王錦繡經文岱帶兵與常祿分路前追
黃昏時李瑞等兵追及於茶陵之大台市潞嶺
地方斃賊數十人我兵陣亡一名是日常祿兵
勇趕至攸縣生擒長髮賊目數名馬龍之兵於
辰刻馳至攸縣河邊探聞賊由對河上流東口

渡繼擁而來當派副將虎嵩林等分兵數百前
往下流渡河由縣北繞出東南五里亭抄過賊
前埋伏馬龍同副將明安泰等帶兵渡河擊之
該逆槍礮齊施我兵撲入賊隊短兵相接賊由
縣東順河一帶奔竄馬龍督兵追殺至五里亭
虎嵩林等伏兵突起殲賊數十常祿探知賊之
大隊改道從攸縣小路直竄醴陵卽緊追至新

市地方屯紮二十四日經文岱兵勇先抵醴陵
之丹陵橋探得隔嶺田溝有賊一股二千餘從
東南路斜抄而來知賊於攸縣分道誘我追兵
直從大路跟勦意欲從後抄襲參將德亮將隊
伍潛伏松林俟賊頭隊已過突出腰擊經文岱
等督率兵勇直衝賊陣該逆退踞路旁譚家大
村相持時許忽分兩股從山溝抄來適王錦繡

李瑞常祿各兵勇齊到亦分左右從高壓下德
亮麾令張國樑捷勇施放噴筒火罐焚燒民房
煙燄蔽天各路兵勇併力攻擊槍礮齊施刀矛
並舉斬殺及淹斃者不計其數餘匪紛紛潰逃
又據向榮和春等稟二十日我軍分由白沙井
仰天湖蔡公墳爲中左右三路進攻妙高峯及
南門外賊營疊獲勝仗參將鄭魁士於攻破白

沙井賊營外牆時正欲搶上內牆頭額被賊槍傷牆堅未能破入妙高峯之賊秦定三等分投迎擊多有斬獲二十三日向榮將城內五千斤大礮移至南門天星閣地方另築礮臺直對賊營轟擊該逆巢穴房屋牆垣多被擊倒二十四日該逆突出四五百人由黔兵營盤之東三路來撲我軍連開槍礮賊見我軍嚴整復分股欲

抄貴勇營盤秦定三督兵夾擊該逆紛紛倒地立時敗退入巢是日計斃賊二百餘人千總李九成奮勇殺賊被賊槍傷登時陣亡其餘兵勇亦有傷亡臣賽尙阿現於九月初一日由衡州統領親兵赴省臣程喬采因新田一帶土匪未淨暫駐衡州督辦並堵該逆回竄之路仍隨時確探賊情或移營岳州斷不敢株守貽誤湖南

儘先參將鄭魁士疊次打仗立功今帶兵攻撲賊營頭額重傷猶復揮兵力戰實將領中不可多得之員相應請

旨將鄭魁士免補參將以副將儘先補用先換頂戴並賞給勇號以示優獎此次賊自郴州竄出總兵李瑞截勦未能得力實屬咎有應得應請

旨交部議處貴州朗洞營參將任大貴湖南千總李九

稱僞西王於二十二日出探地勢被我兵截擊
左肩傷重未愈章政已在郴州病故又據湘潭
縣稟獲僞中王劉得中一名現已解衡審辦至
北門外前派瀏陽鄉勇三百名保護今又添派
防兵一千五百餘名以通文報而顧餉道奏入
報

聞

十二日己未賽尙阿程喬采奏言臣等遵訊余萬

清等棄城各情咸豐二年三月內逆匪竄及全州臣賽尙阿飭余萬清回南防堵該革員帶兵二百名回南因道州緊要前往防守於四月二十一日夜行抵州城時該州防兵及札調千總唐得升兵統計三百餘名二十五日逆匪竄至距城四十餘里之州冲莊水塘一帶該革員以

匪數衆多與王揆一等酌商欲於距城十里之蛇皮渡河岸堵截王揆一未允該革員自帶兵二百名由西門走出當被賊匪衝散王揆一等正欲閉門賊已闖入王揆一被賊打傷當卽由城跳出欲趕回余萬清適賊衆大至失陷城池忿極投河經紳民陳立紀等撈救又欲用刀自刎亦爲衆搶護瞿我謙在城禦賊因見兵丁被

害亦撲城外經兵救免千總唐得升本駐防州境之蔣家嶺經余萬清調回二十五日午後甫經進城賊卽猝至該千總率衆迎敵因衆寡不敵駭臂均受矛傷復被賊打跌城溝經人扶救所有該革員身受各傷均會委員驗明並非裝捏此案已革提督余萬清以提督大員帶兵分守道州因聞賊匪竄近防兵單薄欲赴城外之

蛇皮渡地方堵禦既經該署州王揆一等阻止
仍復帶兵出城以致州城失守余萬清合依守
邊將帥被賊攻圍城寨不行固守而輒棄去失
陷城寨者斬監候律擬斬監候已革遊擊瞿我
謙所稱禦賊撲城並無確據顯係捏飾瞿我謙
亦應照守邊將帥不行固守失陷城寨者斬監
候律擬斬監候已革署道州知州王揆一雖於

失城後未能死節但所稱投河自刎各情已據
各紳民供認甚確且署篆數年頗有循聲民情
愛戴王揆一應請發往軍臺效力贖罪千總唐
得升甫經進城賊卽猝至尙與未能固守者不
同並曾斃賊多名身受三傷但堵禦究屬不力
應請革職免其治罪

賽尙阿程喬采又奏言遵審劉長清等永明失

守一案咸豐二年四月逆匪竄踞道州六月初
八日分股撲陷江華永明縣知縣常遠因與兩
處毗連急須添兵堵禦時劉長清駐紮道州西
路三十里橋十二日親往告急未允常連旋面
稟和春當飭劉長清督帶兵勇趕往江華勦辦
詎劉長清於十四日行抵永明之上江墟地方
該匪已於十三日將永明城池攻陷守備錢志

祖迎擊身受重傷經各兵扶救出城常連適亦
趕到被賊圍住身受刃傷奮力衝出劉長清因
恐上江墟三面受敵有誤事機未敢輕進時常
連受傷折回催請進兵劉長清以賊蹤未定稱
須相機而行常連旋因傷痛臥於民房劉長清
探得路途多已被賊空斷又以廣西富川縣恐
被竄擾稟請攔截卽帶兵繞赴南路進發尙非

藉詞逃遁此案已革四川川北鎮總兵劉長清帶兵前往永明雖於未到縣城時城已被陷救援不及亦應乘勢進攻立圖克復迺以上江墟三面受敵爲詞繞赴鄰境紮營與臨陣先退無異劉長清合依官軍臨陣先退者斬監候律擬斬監候已革永明縣知縣常連因賊陷江華本境兵單輒自赴大營告急雖非畏縮引避究屬

三十一
擅離職守擬從重發往新疆效力贖罪守備錢志祖防禦不力應卽革職奏入

上諭內閣曰賽尙阿等奏遵旨審明已革提鎮並文武員弁定擬罪名各一摺著刑部覈議具奏已革提督余萬清已革總兵劉長清均著徐廣縉派員解交刑部聽候諭旨

程喬采又奏言臣准廣東督臣徐廣縉來咨已

派高州鎮總兵福興統帶兵勇二千名由梧州起程取道郴州該督亦於八月十七日由梧來楚查郴州逆匪既經竄省福興自應速由閒道馳赴長沙會剿毋庸繞道郴州以免遲滯臣已飛行咨會至徐廣縉約計初十日內外可抵衡郡臣俟與該督晤後將防剿各事宜會商妥協亦卽移紮岳州嚴防北竄

同日調任山西巡撫湖北巡撫常大瀆奏言接
准撫臣羅繞典駱秉章來咨郴州大股賊匪竄
至長沙上月二十三日兩次坐船開行約有五
十餘號恐竄下游一帶據在岳籌防之湖北鹽
法道王東槐稟稱盤獲奸細供稱逆匪現在長
沙衆有兩萬欲分三股來攻湖北一由湖南常
德澧州一由岳州巴陵縣一由岳州平江縣各

於陸路行走火藥槍礮擬用船裝載由水路前進等語臣以湖北兵單該匪被勦窮蹙勢必乘虛來犯岳郡緊接湖北水陸均係必由之路荊州滿兵分防湖南毗連處所難以抽調前此改道赴岳之川兵已經南省提往長沙而長沙大營亦無酌撥官兵赴岳助守信息臣雖將到省之安徽兵四百名派往交提臣博勒恭武助防

連前所帶之兵亦止一千數百名逆匪動稱數萬如其竄徧該處實非一二千兵所能捍衛各省解南軍餉由岳州進發江西所解火藥鉛彈亦陸續前去設賊匪竄至必至被其搶劫是岳州一路不僅爲北省屏障實爲湖南運餉要道應請

飭饗尙阿等於長沙大營速撥精兵二千名來岳交博

勒恭武調派以資捍禦再湖北南界湖南北界
河南西界陝西四川東界江南江西皆係水路
通衢儻被該匪竄擾人心必至動搖必於武昌
再添重兵方足以備迎擊請

飭陝甘兩省將前所備精兵三千名派員管帶兼程前
來湖北如賊匪被攻他竄卽可由此調派赴剿
均奏入

上命軍機大臣傳諭徐廣縉程喬采曰岳州水陸交衝最關緊要博勒恭武現在岳州是否可期得力著徐廣縉迅卽酌量情形選派大員統帶精兵前往策應務須杜賊北竄之路至江西交界地方逼近賊蹤該大臣仍當隨時知照該省一體嚴防應如何調遣協濟之處毋稍疏忽郴州永興等處賊夥旣已北竄則福興所帶之兵自應趕緊馳赴長沙一帶併力剿賊

程喬采前已有旨革職留辦糧臺毋庸前赴岳州現在賊匪大夥已至長沙糧臺應設何處並著酌定地方仍交程喬采辦理以專責成

上又命軍機大臣傳諭徐廣縉羅繞典張亮基鮑起豹駱秉章台湧常大瀛博勒恭武雙福曰湖北與湖南緊連水路處處可通現在長沙大兵雲集該匪被剿急迫難保不分股北竄該撫奏調陝甘各兵到楚尙

需時日仍恐緩不濟急所稱盤獲奸細據供逆匪欲分三股來攻湖北各於陸路行走何以又稱火藥槍礮擬用船載由水路前進與羅繞典等咨稱該匪兩次坐船五十餘隻欲竄下游亦不符合究竟賊蹤現在如何情形湖北水路要隘處所如何設法布置均未詳悉籌及朕心實深繫念且岳州一路實爲北省屏障又係湖南運餉要道所關匪細著徐廣縉與羅

繞典張亮基等會商於長沙大營速撥精兵數千名
前赴岳州交博勒恭武調派扼要嚴防如賊衆北竄
所有水陸兩路必應派兵繞出賊前設伏截擊斷不
可但事尾追致賊竄逸又蹈桂林前轍其湖北衝要
各處著台湧常大瀆博勒恭武雙福等相機調度扼
要嚴防

上又命軍機大臣傳諭舒興阿張祥河曰據常大瀆奏

湖北防堵緊要懇請添調官兵赴楚防禦著舒興阿張祥河卽遵前旨將備調精兵三千名迅派得力將弁星速馳往湖北聽候調遣毋稍遲誤

常大瀆又奏言前奉部撥安徽省銀三十萬兩解赴湖北供用查自設防以來供支荊州武昌岳州各處調駐官兵行裝糧餉暨製備礮位軍械火藥鉛子修造兵船建設卡座雇募壯勇漁

勇經費已用銀二十餘萬現在長沙省城被賊圍攻湖北防堵尤爲喫重前安徽河南官兵三千名均已到楚並臣添調省外各營官兵八百五十名又於武昌省會及水陸各路添雇壯勇水勇需用益繁必須再請添撥銀兩以濟軍需相應請

旨飭下戶部卽日酌撥銀三十萬兩解赴湖北俾供支

用奏入得

旨戶部速議具奏旋經戶部議覆擬於陝西等省如數

撥給

上從之

十五日

壬戌

羅繞典駱秉章張亮基向榮鮑起豹

奏言初二日賊匪六七千人突由妙高峯繞至

瀏陽門外校場分三路進撲各營當派楚南官

兵並縣丞嚴正圻同知賈亨晉知府江忠源各帶兵勇迎擊秦定三帶隊從中攻截臣向榮選派城內精兵二百餘名侍衛開隆阿帶領川兵縋城協剿該匪正在分撲營牆和春馳至上前橫截立斃賊匪多名復三面夾擊該匪紛紛倒地兵勇乘勢從賊屍躡過刀矛相接該匪死傷枕藉見勢不敵卽由校場東首敗去正在緊追

賊忽總聚一處回頭猛攻我軍奮力開放槍礮
繼以刀矛又斃數十人賊乃奔竄是日自卯至
申六時之久計斃賊匪四五百名生擒十五名
臣等惟有相機會勦悉數殲滅斷不任稍留餘
孽奏入

上命軍機大臣傳諭徐廣縉羅繞典張亮基鮑起豹駱
秉章和春向榮曰自逆匪圍撲省城經我兵屢挫其

鋒追賊大股來省又經兵勇分擊獲勝賊已大受懲
創其上游各鎮將管帶重兵將次到省福興所帶得
勝之兵計亦趕到正可乘此大兵雲集賊勢挫折之
際合力夾擊一鼓蕩平現在賽尙阿業已革職拏問
大營亟須統帥徐廣縉務當不分水陸兼程前進迅
抵大營岳州湘陰等處爲賊北竄要路前諭徐廣縉
選派大員帶兵數千速赴岳州協防著仍遵前旨趕

緊派員前往其湘陰一帶尤關緊要應如何豫爲堵
截遏賊北竄之路著卽妥密布置並隨時飛咨湖北
江西一體嚴防總期四面兜圍俾賊進退失據自不
難剋期殄除

十七日甲子賽尙阿奏言臣於初一日由衡馳抵

湘潭據報賊已由省城上游渡江於龍迴潭等
處村莊滋擾該處路通寶慶常德距湘潭縣城

僅五六十里又接向榮報賊於初五日乘夜分
二三千人潛由南湖港過河從龍迴潭行走未
知竄往何處其大隊仍踞城南臣惟有密探賊
蹤前行攔截如直竄湘潭亦卽迎前堵勦計臣
所帶親兵二千餘名又潮勇三千係知府朱啟
仁帶在郴州打仗猾強不堪復用帶至衡州請
爲遣散者嗣因衡州糧銀不敷給發恐其在衡

滋事飭令帶赴省城領餉臣到湘潭後查知該
勇等行走距縣未遠卽傳令該知府將該勇等
無論行抵何處卽行登岸前探賊蹤與向榮等
派出追兵前後合擊奏入

命軍機大臣傳諭徐廣縉羅繞典張亮基鮑起豹駱
秉章曰該逆於九月初二日在長沙校場曾經官兵
大加懲創現復分股另竄顯係因省城大兵雲集希

圖分我兵勢所有長沙現到官兵仍當併力直擣賊巢四面堵截不可再任分竄又成尾追之勢其由龍迴潭竄出賊蹤現在滋擾何處亟宜派兵迅速追剿賽尙阿所帶之兵亦可迎頭截擊惟所稱潮勇三千名旣係強猾不堪復用何以又令與向榮等追兵合擊逃竄之賊恐駕馭失宜轉爲賊用不可不防省城大股賊匪前據羅繞典等奏敗回賊巢是否賊首及

夥衆均在妙高峯一帶盤踞抑或另有巢穴在附近
村莊如廣西莫村水竇情形著徐廣縉與羅繞典張
亮基鮑起豹駱秉章等分飭在事文武相機度地或
合力圍攻或出奇兵截斷賊勢杜其接濟路徑痛加
勦洗

十九日

丙寅

賽尙阿奏言據探賊分股由省城渡

江至龍迴潭等處又渡見家河而南屯踞陽湖

等村與平塘地方相距數里平塘爲湘潭進省
必由之路臣飛飭知府朱啟仁將所帶潮勇先
赴平塘紮定一面親督官兵前往堵剿初八日
黎明突有賊船數隻泊近西岸約數百人登岸
撲營朱啟仁帶勇奮擊斃賊多名該匪旋即回
船我勇追殺開礮轟斃賊匪數名賊船撐出江
心西岸樹林突起伏賊千餘我勇迎擊見家河

又有賊約二千餘前來接應其江心賊船復回
攏西岸適臣帶兵及水勇礮船趕到開礮擊碎
賊船三隻追至豹子山腳並將東岸賊立望樓
一座擊倒見家河及陽湖賊衆見我官軍大隊
又到俱卽奔回並據向榮稟稱派馬龍帶兵渡
河約次日與潮勇等夾擊初九日黎明遊擊韓
世禧鮑雲翥蕭逢春秦如虎都司許連城等各

帶兵勇分爲兩隊直攻賊巢仍令礮船由水路
助攻陽湖村賊立即潰逃我軍乘勢進攻旋將
賊踞陽湖一帶村房盡行燒燬賊由小艇渡過
見家河北礮船趕至轟毀賊船二隻賊匿河北
營壘不出兵勇梟水擊賊者受傷數名陣亡一
名臣卽日從嶽麓山後取道前進令朱啟仁潮
勇卽於見家河南岸紮定以防賊再渡河南竄

臣於初九日抵省與羅繞典等籌定戰守再行具奏奏入

上命軍機大臣傳諭徐廣縉羅繞典張亮基鮑起豹駱秉章曰逆匪分股由省城渡江至龍迴潭等處又由該處渡見家河而南屯踞陽湖等村雖經賽尙阿督率兵勇連擊獲勝將賊截回北岸並將南岸陽湖等村賊巢盡行燒燬惟見家河路通省城江面該逆已

有船隻數十艘船五六隻隨時可以偷渡現祇有潮
勇一軍專堵見家河南岸之路仍恐未能得力而北
路一帶尤關緊要必須將西岸之賊痛加剿洗其城
南大夥尤應併力攻擊萬勿遷延致令分竄現在賊
衆全在長沙城外情形萬緊統率無人何以至今尙
未見徐廣縉奏報抵楚日期著該大臣迅速兼程前
進直赴省城與羅繞典張亮基駱秉章鮑起豹等督

率文武乘此賊夥聚集之時合力攻勦一鼓殲除

二十二日己巳賽尙阿羅繞典張亮基鮑起豹駱

秉章奏言臣賽尙阿自衡州起程時卽催督各

軍迅速援勦據探賊中糧食漸乏連日賊船偷渡河西擄掠米穀躡探路徑似有急竄之意臣

賽尙阿由湘潭南路疊勦將陽湖賊巢屯聚米穀盡行焚燬常祿等兵由朱田鋪進至洞井鋪

地方偏賊而軍初三日向榮令開隆阿鄧紹良各帶兵縋城出勦秦定三帶兵由城外營盤迎至阿彌嶺地方遇賊四五百人由南路來當經我軍擊退斃賊七八十人初四日和春約常祿等移近駐紮正在拔營賊五六千人分股來撲李瑞營盤槍礮如雨常祿分兵接應直衝賊隊賊始敗走乘勝追殺數里斃賊無數初五日移

營至石馬鋪地方初六日探得賊已分股於我軍紮營上游數里渡河和春等疊攻南門外賊巢賊堅匿不出初八日我軍進至金盤嶺該逆繞出東面踞住嶺頭勢欲從高壓下我兵奮攻賊陣移動乘勢趕殺頗有斬獲總兵常存帶兵勇二千名駐紮對河以防賊西竄甯鄉北竄湘陰益陽之路經首府縣各派壯勇潛往河面燒

去賊船十餘隻賊見河西既有準備又於上游之見家河乘夜分股偷渡築營向榮飛調馬龍兵會賽尙阿所帶之潮勇等合剿將河西賊踞房屋及屯聚米穀盡行燒燬南門外踞賊經向榮將東南鼇山廟等處房屋打壞楊秀青遣賊黨晝夜挖掘地道俱經兵勇殺斃現今兵勇就城外挖成橫溝一道惟正南及西南面賊踞房

屋尙多完固妙高峯一帶地勢較高賊立土城
望樓近守甚堅臣等籌議合圍攻擣以河西一
路已有分股渡河之賊必須先爲翦除臣賽尙
阿飭向榮統領新到屯兵及鄧紹良馬龍常存
兵卽日渡河與現在平塘潮勇三千名合勦河
西之賊和春秦定三等兵合力攻打南門外賊
巢十二日至漁網洲地方賊從見家河出二千

餘人經我兵槍斃數十遊擊曾正川首先搶入
賊隊短兵奮戰手刃悍賊數人身受多傷登時
陣亡我兵正在喫緊之際向榮飛騎趕到親率
屯兵二三百人接應奮勇衝殺賊匪紛紛倒地
卽時敗走兵勇追殺直過兩重山梁餘賊竄歸
舊巢和春秦定三帶領兵勇攻南門外賊巢賊
三四千人出敵我軍用槍礮擊斃十餘人賊幾

身之軍門之四卷一
三
次來撲均被兵勇擊走忽南面出賊一二千人
叢擁而來適開隆阿帶兵接應張國樑等兵亦
由南踵至我軍聲勢聯絡斃賊無數賊奔回巢
現在和春秦定三紮營妙高峯下緊逼賊巢必
俟向榮將河西分股之賊先爲勦洗該逆勢孤
較易得手奏入

諭內閣曰現在省城兵力厚集和春秦定三紮營妙

高峯下與賊營緊逼逆首楊秀青屢謀開掘地道俱被我軍破其詭謀賊勢漸蹙亟欲覓路遁逃南面常祿等營分布梭巡聲勢極爲聯絡徐廣縉卽日亦可統帶精兵馳抵長沙務須乘此攻剽得手之際嚴飭向榮一軍將竄赴西岸之賊先行剿洗其城南賊巢東西南三面圍定並著激勵兵勇各路會合併力殲除毋任潰圍竄出復滋擾害陣亡貴州護遊擊曾正

川著交部照例議卹

二十九日

丙子

上諭內閣曰貴州提督善祿著赴湖南軍營交欽差大臣徐廣縉飭令管帶弁兵辦理勦捕事務

十月初二日

己卯

賽尙阿鮑起豹羅繞典張亮基

駱秉章奏言自臣賽尙阿到省後城外賊巢防

備加緊河西分踞之賊亦因向榮帶兵渡河往

勦又從河東渡賊添紮賊營數處自見家河至
嶽麓山腳賊營中間踞地將十餘里十三日向
榮親督各兵由排頭口與朱啟仁潮勇南北兩
路進攻將山邊賊踞村莊燒燬斃賊約三百餘
人朱啟仁潮勇亦計誘該逆出敵約千餘人潮
勇等與礮船水陸並進見家河賊營扛出大礮
沿岸拒敵委員張宏邦帶勇登岸奪獲賊銅礮

一口約重四五百斤賊又由北岸沿河西走欲
從上游過河包襲參將秦如虎等急率廣西兵
由南岸沿河飛往迎擊兵勇梟水過河乘勢衝
殺斃賊多名燒燬北岸田中賊營一所十五日
礮船至見家河口賊營復出數百斤大礮並用
大船載礮對擊被我礮船擊破二隻十六七日
向榮將四川廣西兵一律移近趕築營壘並令

潮勇仍由車壇渡過河攻擊潮勇至龍迴潭地方有賊數百踞守潮勇槍斃數十名餘俱奔回下游河岸賊營十八日向榮分派各路指攻漁網市唐家洲黑石頭賊營賊伏牆內開放槍礮牆外竹籬徧地竟難攻入馬龍督兵將賊踞屋焚燒副將明安泰帶川屯兵由左家壠繞來潮勇亦過河進至見家河北岸夾攻鏖戰六時之

久殺賊過百此河西岸數日攻勦之實在情形也。和春秦定三兵十三四日分路攻奪妙高峯西湖橋等處賊營將賊牆外望樓哨棚燒燬常祿兵移營進逼金盆嶺與賊僅一田隴之隔。十四日直攻賊營一面出隊至大河邊新開鋪地方築營分兵往紮。正攻賊營之際忽賊一股從河邊翻山前來接應被新開鋪築營兵勇擊退。

十五日李瑞經文岱王錦繡等亦於五鼓直抵
黃土嶺賊營槍礮齊施將賊牆草棚延燒賊旋
撲滅仍於牆孔密施槍礮我兵撲攻數次疊有
傷亡此省城外官軍攻剿之實在情形也臣賽
尙阿張亮基等密飭鄧紹良兵由魁星關城下
地洞出至南門外攻打碧湘街賊巢光祿寺署
正勞文翻所帶彪勇亦隨同前往賊匿牆孔內

施放槍礮我兵由後牆拋擲火罐焚燒該匪見
火勢緊急蠡擁出巢迎敵我兵奮力攻擊槍斃
賊匪多名臣等偵察賊情及研獲賊供現在賊
中粵匪死黨不過數千惟新附茶醴安攸及郴
桂各屬脅從之徒則不止萬衆現飭各文武凡
有緝獲逸出賊犯果係脅從者務卽省釋期於
解散或收實效竊計省垣重地逆賊攻擾已經

五旬臣等現飭將弁等嚴加偵守臣徐廣縉到楚尙無確信提督福興所帶兵勇聞抵道州臣賽尙阿當卽飛催迅由衡州湘潭取道河之西岸前來與向榮之軍合力會剿

賽尙阿鮑起豹羅繞典張亮基駱秉章又奏言河面牛頭洲等處有賊盤踞向榮親督官兵從牛頭洲上之江神廟一帶涉淺渡河該匪先從

樹林出賊數百拒敵總兵馬龍親率兵勇開放
槍礮斃賊多名該匪不能抵敵卽時敗回復從
林內擁出賊千餘人經總兵王家琳督率官兵
橫衝而出賊匪紛紛倒地仍望林內奔回我軍
連燒賊踞村房數處奏入

上命軍機大臣傳諭徐廣縉曰逆匪攻擾長沙已經五
旬我兵雖連日攻勦獲勝總未直搗賊巢大加懲創

徐廣縉此時諒已帶兵馳抵長沙省城接受欽差大臣關防及湖廣總督印信所有軍營及地方文武統歸節制該大臣務當申明紀律督飭在事文武乘此賊匪屯聚一處併力圍攻以期一鼓殲除爲擣穴搃渠之計萬不可任令竄逸更滋蔓延至河西分股賊匪尤須趕緊剿滅福興所帶之兵諒亦趕到著卽飭令合力會剿如將弁有臨陣畏葸退避仍蹈從前惡

習者該大臣卽一面奏聞一面於軍前正法逆首洪秀泉楊秀青等是否均在妙高峯一帶賊巢務須設法殲擒應如何解散脅從以孤賊勢諒該大臣必能統籌全局以副委任也

初九日丙戌陝西道監察御史王茂蔭奏言安徽

與兩湖一水可通湖南大兵勦賊賊破必將四竄設或竄入湖北則順水乘風三四日可到安

省防堵不在省城而在安慶府屬之宿松該縣
與湖北黃梅江西彭澤均屬交界大江中流特
聳一小孤山儼爲門戶非獨安省之阨塞實亦
全江之鎖鑰於此處善爲設防賊斷無從飛越
至陸路獨太湖縣界湖北餘如望江婺源祁門
建德東流皆界江西山路處處可通安能一一
設防大抵交界處率有崇山峻嶺可守惟當令

府縣體察情形敦請紳士告以團練章程使勸
諭該處附近村莊自行妥辦其在官者則貴立
法以拏土匪懸賞以緝游匪無庸官辦防堵招
聚無賴徒滋擾害奏入

上命軍機大臣傳諭蔣文慶曰王茂蔭奏皖省設防不
在省城而在安慶府屬之宿松縣此地與湖北黃梅
江西彭澤各縣交界大江中流有小孤山爲門戶於

此善爲防堵賊自無從飛越至於陸路獨太湖縣界連湖北餘如望江婺源祁門建德東流皆界江西率有崇山峻嶺可守惟當令府縣各官勸諭紳民互相保衛無庸官辦防堵等語著蔣文慶按照所陳各節詳細體察不動聲色妥爲籌辦

十二日己丑署湖廣總督徐廣縉奏言臣在桂林

省城奏報起程後卽將所帶兵勇水陸並進現

於十月初一日行抵衡州據各路探報長沙城外河西之賊多於河東兩岸俱有賊營並於江面搭造浮橋見家河口已築礮臺向榮之營現紮河西臣已飛飭福興督帶兵勇馳往會剿前後夾攻又江面之賊利用船礮火攻臣隨營員弁楊雄超等熟諳船礮卽令在衡州趕緊置備隨同高廉道沈棣輝高州鎮玉山先行分帶前

進臣俟布置齊備亦卽馳往湘潭就近督辦總
期將此股勦滅聲威旣振方可挽積疲之勢現
在長沙分路圍勦之兵似難撤動臣已飛飭福
建兵三千名由萍鄉一帶堵截其各省續調之
兵應請

旨飭令行抵岳州各等處分駐防堵毋庸再赴長沙庶
或防或勦得專責成奏入

上諭內閣曰徐廣縉馳抵湖南衡州已飭令福興督帶
兵勇馳往長沙會同向榮攻剿河西一帶賊匪並派
隨營熟諳船礮之員弁楊雄超等隨同高廉道沈棣
輝高州鎮玉山分隊前進徐廣縉亦卽馳往湘潭就
近督辦所有福建兵三千名業據飭由萍鄉一帶堵
截其各省續調之兵著卽分紮岳州防堵該大臣務
當嚴申紀律督率鎮將等同心協力直擣城南賊巢

毋令紛竄如有遷延觀望畏葸不前甚至賊至卽潰
賊去不追貽誤事機者卽將帶兵之員用朕賜退必
隆刀軍法從事以振積玩而肅戎行

十六日癸巳羅繞典張亮基駱秉章鮑起豹奏言

省城東面一帶路通湘潭等處最爲喫緊我兵
於各營盤空處趕挖長濠一面密致向榮等扼
截河西賊匪去路九月二十五日總兵和春分

飭各營出隊齊抵賊巢該匪於妙高峯外遙開
槍礮抵拒經我兵擊斃數十人二十六日朱啟
仁張國樑等復會攻浮橋河面有賊駕礮船十
餘隻兩岸接應之賊約二千餘人朱啟仁督勇
開放槍礮賊匪紛紛落水二十九日賊於南城
西邊暗放地雷城身蟄陷四丈有餘該匪約二
三千人蠶擁向前副將鄧紹良大呼躍出缺口

手刃數賊右膊被礮子穿過尙屹立不退賊目
麾衆直上千總趙繼宗頭受槍傷登時陣亡弁
兵奮勇向前立將賊目斬首奪獲太平先鋒字
樣大黃旗一面乘勢壓下殺斃長髮賊匪百數
十名短髮賊匪約三百餘名餘賊紛紛敗退臣
等立飭署長沙府知府倉景恬等迅將缺口補
砌此二十九日賊匪猛撲城垣弁兵奮勇獲勝

之實在情形也其河西一帶向榮馬龍於三十日五鼓出隊副將明安泰督兵勇開放槍礮立斃多賊參將虎嵩林等從上游接應一面攻拆浮橋賊亦掉船十數隻近橋救護我兵躍上浮橋斃斃數賊奪獲賊船二隻賊匪紛紛鳧水逃竄十月初二日我軍正在南月城外加挖濠溝忽該處地雷轟發離城根丈許土石迸裂賊匪

突出二三千人盪擁直前和春揮弁兵迅由本營橫衝而出攜親兵二人上城躬臨堞口指揮殺賊忽賊中一礮飛來親兵二人應聲倒斃和春亦被堞甄碎砂撲傷頭面並傷右手倉卒間知府江忠源所部軍功徐以祥首先帶勇由城西缺口兩旁搶下直奔賊隊同時鎮守弁兵亦搶下會合和春所帶兵勇三路合力衝殺鏖戰

逾時殺斃賊匪三百餘名此初二日賊匪猛撲
省城兵勇奮勉獲勝之實在情形也現在仍將
城外濠溝趕緊加挖以防地道 臣鮑起豹晝夜
駐城防守和春等固守東南北三面各要隘向
榮等屯紮河西不敢稍有疏虞行閒文武官紳
奮勉出力擇尤開列懇請

天恩獎勵奏入

上諭內閣曰此次賊匪暗用地雷連撲省城經羅繞典張亮基駱秉章鮑起豹等督飭官兵殺斃多名疊獲勝仗勦辦尙屬認真所有戰守出力各員自應量予恩施總兵和春著交部議敘知縣王葆生著賞戴花翎以同知升用陳丕業著交部從優議敘縣丞楊恩綬著免補本班以知縣補用照磨蕭盛遠著以縣丞遇缺卽選並賞戴六品翎頂副將鄧紹良著賞加總

身之身圖二田卷一
三十一

兵衛都司全玉貴著以遊擊儘先補用周兆熊著賞
戴花翎千總蕭知音著免補守備以都司儘先補用
守備蘇元林著以都司印用萬年新侯光裕均著賞
戴花翎把總龍正耀著以千總儘先補用徐嶸姚大
興外委尹開泰均著賞戴藍翎楚勇頭目徐以祥著
以把總儘先補用陣亡之千總趙繼宗著交部照例

議卹

同日

上諭內閣曰阿勒楚喀副都統薩炳阿著發往湖南軍營交欽差大臣徐廣縉酌量調遣

二十六日

癸卯

徐廣縉羅繞典張亮基略秉章奏

言查湖南前因逆匪在粵滋擾先後調兵堵剿及逆匪竄擾楚境攻偏長沙添調各省兵勇合剿需費甚鉅經前任督臣先後奏奉

諭旨飭部籌撥各省餉銀四百餘萬兩除已陸續解收外各省未到銀兩尙有一百六十餘萬兩現在司庫實存之項不及三十萬兩各省未到軍餉誠恐輾轉解運貽誤事機惟有仰懇

天恩俯念軍務緊要

飭部在於附近各省再籌撥銀二百萬兩以濟要需奏

八得

旨戶部速議具奏旋經戶部議覆請於江蘇等省共撥
銀一百萬兩其餘銀一百萬兩容俟臣等另籌
續撥

上從之

二十七日

甲辰

徐廣縉奏言臣現駐湘潭查得逆

匪屯踞長沙城南兩月有餘尙未竄動自分踞
河西以後搭造浮橋往來接濟河西賊營實已

多於河東其東面一帶業經前大學士臣賽尙
阿督飭將弁挖濠分堵自長沙南門外蔡公墳
起至豹子嶺止連營十餘里挖濠寬深丈餘堵
其東竄臣現已函致向榮督飭各路鎮將力籌
攻剿至進剿次第誠如

訓示河西分股賊匪尤須趕緊剿滅確查長髮賊匪男
女老幼不過四五千入其衆萬餘多係土匪如

聞

能將河西股匪剿滅則應援旣絕圍剿不難至
湘潭地面距省城九十里距賊營五十餘里實
爲衝寶等屬扼要之地臣擬卽駐紮湘潭於西
南一帶可資鎮壓且於大營呼吸相通亦可隨
時調度奏入報

同日署江西巡撫張芾奏言賊在長沙盤踞城

南官兵圍剿日久深恐分竄江西袁州所屬之萍鄉密邇長沙本年七月間署鹽巡道王訓暨袁州協副將蔣益輝已赴該處防堵近日九江鎮總兵清保又自湖南帶兵折回亦在萍鄉駐紮袁州府城及所屬之萬載縣均與湖南連界各派委員協同地方官防守若吉安府屬之蓮花龍泉等廳縣與湖南茶陵等處交界而蓮花

願尤爲緊要現有本省防兵八百餘名復將江蘇清標兵四百名派赴防守南贛鎮總兵阿隆阿暫駐吉安府城俟何處有警卽就近馳往督辦臣前聞賊有窺伺長江之意當以九江府襟帶江湖界連吳楚實爲咽喉要地卽與臣陳孚恩商派督糧道吳其泰等查勘險隘妥籌布置茲據稟稱九江府屬瑞昌縣爲湖北入江西第

一門戶陸路與湖北興國州接壤水路則縣北馬頭鎮地濱大江對岸爲湖北廣濟縣武穴鎮等語現有江蘇狼山鎮遊擊薛升堂管帶官兵六百名在馬頭鎮駐紮又有福建署總兵音德布統帶官兵一千名到境經臣撥赴九江會同擇要扼紮並添設礮位以資捍衛九江水師戰船日久廢弛臣卽行司籌議辦理第恐緩不濟

急已函商督臣陸建瀛將鎮江水師三板巡船酌借數隻應用奏入

上命軍機大臣傳諭張芾曰九江一郡爲吳楚咽喉先事豫防固當籌及第賊匪現在長沙經大兵攻剿若竄江西地界自以袁州吉安爲最要關鍵九江距湖南尙遠較之萍鄉等處緊接賊匪地方者有閒該署撫惟當酌量緩急妥籌辦理兵分則單設非緊要之

區派撥較多恐於應行嚴防處所轉致疏忽戰船廢弛已久經費當支絀之時倉猝籌辦不但購料修造緩不濟急且徒糜餉需無濟實用江蘇三板船隻果否足資巡緝抑可就本地商漁船內酌度情形豫備應用該署撫務須不動聲色嚴密籌維勿使安堵居民因此驚擾